

Jimare

3

1987



Mîrkutên xwe bilind kin !

# MÎR KUT




KOVARA HER TIŞTÎ YE JI BO HER KESÎ YE



RAMBO: "PIŞTÎ AFGANISTANÊ

EZÊ WERIM KURDISTANÊ"





**mirkut** میر کوت

**Kovara Kurdî a Mîzahî**

گوڤارێکی گالته و گهپی کوردی به

**Humoristisk Kurdisk  
Tidning**

**Journal Humoristique  
Kurde**

خاوهن و بهرپرسيار:

*ansvarig utgivare  
och redaktör:*

**Mahmûd LEWENDÎ**

**Adress :**

**Post Box: 24012  
750 24 Uppsala  
SWEDEN**

**Prix: 10 SKr/10 FF/2 DM**

**Tarîxa çapê: 1.01.1987**

**Merheba**

**Em jî dizanîn ku em bi  
derengî ketine !**

**Divê deh meh berê  
hatiba derxistin, lê em  
çi bikin, çavê tunebûnê  
birje !**

**Ger we jî tunebûn dîtibe  
wê gavê hunê fam bikin  
ku ji bo çi em bi derengî  
ketine.**

**Lê, dîsa jî bibexşînin.**

**MÎRKUT**

# ÇEND GOTIN

Ev e jimare 3 jî derket, heta jimare 4 xwe dê mezin e.

Jimareya pêşîn ji kîsî me çû!

Jimare 2 jî, me 1200 heb çap kir, jê 800 heb hat fitotin, lê perê 100 hebî gehîşt destê me, 'ecêb e wellah ul-'ezîm !

Kovara Federasyona Komelên Kurd li Swêd; Berbang'ê (di jimare 7/85'an de) dîsa bela xwe di me daye, çî ye efendim, navê Mîrkutxelet hatiye nivîsandin, bi ya wan divê ne Mîrkut lê "Mîkut" an jî "Mêkut" be. Dîsa di jimare 2 ya Mîrkut'ê de me rexneyek li Berbangê girtibû, çimkî heqaret li kovara me kiribûn, li şûna ku bigotana "kovara mîzahî", gotibûn "kovara qerfan". Li ser vê yekê em jî hinekî geherîbûn û me rexneyek li wan girtibû. Îcar wan jî goya rexne li rexna me girtine, û hinekî jî bi ser ve kirine. Lê nivîsek welê ecêb nivîsîne ku çewto-mewto û xwaro-maroye, ser û binê nivîse li hev geryaye, ji ber wê jî me tu tiştek ji wê rexna (!) wan fam nekir ku ber siva wan bidin.

Tiştêkî din jî, me bihîst ku serokê Enstîtuya Almanayê ji me geherîye, yanê bi gotineke din tûre bûye. Çimkî me di hejmara berê de rexne li kitêba Thomas Bois girtibû ku serokê vê Enstîtuyê Y. Geylanî jî navê xwe li ser kitêbê nivîsibû.

Ji alî ekonomîyê de jî rewşa me ne wekî be  
rê ye, lê jê xerabtir e. Li derveyî 7 kesan tû  
kesî alîkarîya me nekir. Ew kes jî ev in:

Alî Bucak (Paris).....500 Frank  
Bekir Şahîn(Sydney).....306 Kron  
Lutfî Baksî(Stockholm).....200 Kron  
Malmîsanîj(Stockholm).....500 Kron  
M.Emin Bozarşlan(Stockholm).. 50 Kron  
Nûrî (Paris)..... 90 Frank  
Nûreddîn Zaza(Lozan)..... 70 Frank  
Restaurant Dîlan(Paris).....250 Frank

Îcar çi şansekî xerab ! Gava ku xwedê li  
ev neyne xerabtir jî dibe. Heval Bekir Şahin  
306 Kronê xwe li ser navê me yê maxlas(naznav)  
şandiye ku wê jî em nikarin ji bankê bikşînin.

Heval Reşoyê Qerejdaxî jî divê bibexşîne  
ku me nikarîbû cîh bida nivîsa wî ya bi navê  
"Serzullût". Nivîsek hêja ye, lê ma xwedê jê  
razîbîyo 12 rûpel nivîsîye, ji xwe kovara me  
çend rûpel e!!!

Tiştêkî din jî, divê hun li qusûrê me nenê  
rin, ji ber ku me ev hejmar 8 meh berê hazir  
kiribû, lê fersend û mecal û îmkana me ya çap  
kirinê tunebû ku me çap bikira, ji ber wê ye-  
kê jî mumkune ku hin nivîs aktualîta xwe win-  
da kiribe.

De bimînin di xwesîyê de  
Ger we perê xwe da mala we ava!

MÎRKUT

MÎRKUT



BELAV DIBE.

Belê, Mîrkut belav dibe (neku ji hev de dikeve û perçe dibe), nav û dengê Mîrkutê ji Amerîka ta Awîstralyayê, ji Antartîka ta Afrîkayê, li her derê dinyê belav bû û dibe.

Ji reşikên Afrîkayî bigrin ta bi gundiyan Kercewsê dexî, êdî hemû xwedan Mîrkut in, Mîrkutên wan di destê wan de her têdikut.. pardon, têdikoşin.



NAMEYEK **JI ŞAMÊ**

*Rifaqên me yên 'ezîz di mucella MÎRKUT de.*

*Bi sereha ez gelekî besitîm ku min mucella we xwend. Lî ennehu wexta ku mucelleyeke fukahî bi zimanê kurdî îzdar dibe y'anî tetewîrek melhûz di tarîxa sefaht el-kurdî de tê încaz kirin.*

*Ez bi xwe şexsen kitîr temennî dikim ku hûn her daîm û kul yewm îstîmrar bikin.*

*Museqqefekî Kurd-Wetenî  
-ŞAM/DIMISQ-*

**BERSÎVÛHA:** Yanê bersiva me

Heval el-xoşewîst

Yûdil geşûna ennû bersivûke, 'ela gotinûkatûke el-baheyat w'el-giranat el-ku nayên hilgirtin w'el-nayên daqurtandin.

Çimkî nametûke ket fî destûna, fekul xwendevanûna têdinegehiştûna. Fe ennû daxwazû minke en tu were m'ea nametûke fi caretên din, yan jî hîn bibe zimanûke.

El Beşet ul- Vegerandin  
Fî Kovaret el-MÎRKUT



(pendî pêşînan)

**Gotinê bav û kala**

HETA MIRINÊ  
ÇAV LI KIRINÊ.

KESO KESO  
CAREK BESO

XEMA KOR E  
MÛM BUHA YE.

HETA GENIM FIRÎK E,  
MELLE ŞIRÎK E

KEVIRÊ HAVÎNÊ,  
BAVÊJE KULÎNÊ.

BILA HINDIK BE,  
BILA RINDIK BE.

BUHARÊ - PEZ  
PAYIZÊ - REZ  
ZIVISTANÊ - EZ

EZ AXA, TU AXA,  
KÊ GOLIKA BIBE  
NAV BAXA ?



-Be amade kirdinê Kurtemuxbîrê  
MÎRKUT

# KIN KURT

## deng Ûbas

### STOCKHOLM

Paksî ji Amerîkayê vegerya û yekser çû Awis-  
tralyayê û nuha jî li Îspanyayê ye.

M.B. ewê îsal jî di balkona xwe de baxdenos,  
turp û pîvazan biçîne.

Li gor gotina Paksî, xelkê ew kiriye endamê  
PEN-KLUB'ê, îcar tiştêkî ecêb Heme Ûzin jî  
endamê wê Qûlibê ye.

### BONN

Dr. Yekta li Almanyayê xwe kir serokê Enstîtu  
yê.

### PARIS

Serokê Enstîtuya Parîsê jî Kendal e.

### JI DUNYÊ

Çareya AIDS'ê hat dîtin: îsot

Ruhayî bi saya serê îsotê ji AIDS'ê filitîne.

Mîrkut derket.

Xumeynî bi AIDS'ê ket.

Seddam neket.

Xwedê mezin e.

Ezê jî herim Amerîkayê û piştire Antartîkayê.




## diyalogek

Kurdo

- Te got çî ?
- Min ?!
- Erê te.
- Min got çî ?
- Erê te çî got ?
- Min tiştêk negot.
- Lawê segan, te got.
- Kurê kûçikan, welle min negot.
- Dolê kotiyân, ez dizanim, te got.
- Min negot.
- Te got.



- Kurê qahpê, min got û zêde!
- Teq, tûûûjjj.
- Teq, teq, ...
- Gummmmmmm!
- Axxxx bavo, ...
- Axxxx yadê, .....



- Hawasar, kurê meyê wek şêr, bi destê kuçikan hat kuştin, ...
- Hahooo, lawê meyê egîd bi destê rûvîyan hat kuştin, .....

ÇÎROK HÎNA JÎ BERDEWAM E, ... Kî dibêje em ne mêr in?!

## beytek

NE SING Û NE SÊWAN E  
REPE REPA MÎRKUTAN E !



Melle Mîrkut

# qisê qorr!

NIVÎSKARÊ wê : Ez

Çend roj berê ez li kafeyekê(café) rûniştibûm.  
Garsonê kafeyê hat ba min û got:

-Çi dixwazî ?

Min got:

-Qahweyekê ji kerema xwe re.

Garson qahweya min anî danî ber min. Wekî her gav min pêşî cixareyek derxist û vêxist. Di pê re min şe kir avêt qahwê, dawyê min bi kevçî hêdî hêdî li hev xist. Şekir û qahwe baş li hev geryan şûn de, min hilmek din jî ji cixara xwe kişand. Lê ev hilma ne wek hilma her wextî bû, hilmek welê bû ku dûman heta binê pişika(cîgera) min a sipî çû, li jêr zemînî cîgera min ket û têde fetilî. Di hemûyê fetlanokên cîgera min de gerya û ruyê xwe da berbi jorê, hat nêzî kî qirikê, di wir re jî di bin zimanê biçûk re hat nava devê min, li ezmanê devê min ket û di nava devê min de hinekî gerya. Li qulukekê, li riyekê digeriya ku çawa bike derkeve der. Xwe nêzî ber diranan kir, di ber diranan re xwe şemitand hat ket nabêna diran û lêvan, li wê derê jî xwe hinekî gevizand û di pêre xwe li bin çengê pidîyan xist û di nava her du lêvan re derket der...!

Belê, a wê gavê, ango di pê vê bûyera dûmana cixarê re, divîya ku qultek qahwe bihata vexwarin.

Wele hema min hêdîka destê xwe yê rastê dirêjî qulpa fîncana qahwê kir. Min hêdî hêdî fîncana qahwê rakir berbi devê xwe bir. Lêv ji ber xwe ve ji hev vebûn, wek erdekî ku qet gîsin lêneketibe û li hêvîyê be. Û fîncana qahwê pêre pêre xwe nêzî lêvan di kir. Gehîştin hev. Devê fîncana qahwê devê xwe da ser lêva jêrîn, lêva jêrîn di wê gavê de wekî ku ji nû ve biafire vejîya....





# BAJARÊ BISMILÊYE GÎDIPSEEN?

Li hêla Bismilê, ji gundê Koselîyê  
merivek ewê biçe bajêr.

Jina wî jê re dibêje:

-Ma bajarê Bismilêye gîdipseen,  
Fatoşêye bîr don getiir.

Mêrik:

-Ne bilim ne qederdiiir!

Jinik:

-Hema bîr mîtro bîr nîgine  
Bîr mîtro jî dîger nîgine,  
Ellî santîm nav nîgine  
Girmî bêş santîm jî pizîsine  
getir, bestir.



Kemal/Bismil

## BANG EK !

Jibo redaksiyona Mîrkut, em li kurdekî  
digerin ku divê qet helbest(şîir) nenivî-  
sandibe û dîsa divê di demên dahatû de jî  
nenivîse.

Sekreterê Kar û Barê Mîrkut





Piştî hevdîtînin û axaf  
tinên dûr û dirêj, Rambo  
hate iqna kirin ku were  
Kurdistanê.

Ev bû şeş meh e ku he  
yeta jibo îqnakirina Ram  
bo çûbû Amerîkayê, bi to  
nek bertîl û ruşwetan an  
cax xwe gihandine Rambo.

Di pê munaqeseyek dûr  
û dirêj re Heyeta me Ram  
bo iqna dike ku were Kur  
distanê, fîlimekê li ser  
kurdan çêke.

Li ser vê yekê Redak  
siyona Mîrku<sup>t</sup> derhalkê  
civînek çêkir. Civîna me  
5 deqge ajot, tenê birya  
rek hate girtin; ew jî:  
'el el-'ecele şandina  
muxbîrekî Mîrku<sup>t</sup> bo Holl  
ywood'ê. Û wele hema me  
hemûyan çl pere di bêrî-  
ka me de hebû, me gişk  
da vî muxbîrê xwe û me  
bilêta tiyarê jî jê re  
kirî û me bi rê kir şand  
Amerîkayê jibo dîtina

Rambo û Heyeta Kurd. Nuka em li jêrê . xeberên ku muxbîrê me bi teleksê ji me re şandiye pêşkêşî we dikin:

" Min Rambo dît. Rambo hatiye îqna kirin, ewê were Kurdistanê, lê ne îsal, ji ber ku îsal ew dê biçe li Afganîstanê fîlimekê çêke, û di vê fîlimê de (fîlim îcabî) ewê Afganîstanê ji bin destê Rûsan xelaske. Di pê re (yanê di fîlima du doyan de) îcar ewê were

Kurdistanê. Ewê Kurdistanê jî ji bin destê Rûsan xelaske."

### Sertên RAMBO

Şertên Rambo gelek in ji wan yek jî ew e: ku hemû kurd qebûl bikin ku Kurdistan 5 perçe ye. Li gor Rambo heta nuka tenê 4 perçên Kurdistanê dihatin zanîn, lê Rambo perçê pêncan jî kifş kiriye. Li gor wî perçê pêncan di bin destê Rûsan de ye

Li ser vê yekê muxbîrê me jê pirsîye:

-Ma çawa dibe?

Rambo:

-Belê, ev rastîyek e û berî her tistî divê ku kurd vê yekê qebûl bikin ku Kurdistan 5 perçe ye. Yanê Kurdîstana Tirkîyê, ya Sûrîyê, ya Iraqê, ya Iranê û Kurdîstana Rûs-yayê, ku perçê herî mezin jî ew e. Ma hun qet



rojname û kovaran naxwî-  
nin ? Hemû dinivîsin ku  
ji Ermenîstanê bigre he-  
ta bi Qazakîstan û Azer-  
beycanê kurd hene. Ji vê  
jî tê fam kirin ku perçê  
herî mezin di bin destê



Rûsan de ye. Ev fîlima  
min jî bi taybetî ewê li  
ser vî perçeyî be, yanê  
Kurdîstana Rûsyayê. Di  
vê fîlimê de ezê Kurdis-  
tana Rûsyayê ji bin des-  
tê rûsan xelaskim.

(dumahîka vê nivîsarê  
emê di hejmeta dahatû  
de belavbikin. Mîrkut)

## STUDIA KURDICA JÎ DERKET !

Axirê li dawîya dawî-  
yê "STUDIA KURDICA" jî der-  
ket.

Di dawîya 1983'an de  
nivîs civandin.

Di destpêka 1984'an de  
nivîsên civandî daktîlo  
kirin.

Di dawîya 1984'an de  
mîzanpaja wê çêkirin.

Di destpêka 1985'an de  
jibo çapê birin matbaayê.

Di dawîya 1985'an de  
ji matbaayê derket.

Di destpêka 1986'an de  
jî, ji me xwendevanan re  
sandin, û ewê di dawîya  
1986'an de jî bigehîje  
destê me. Her çendî ge-  
hiştîye destê hin kesan,  
lê ew torpillî ne!

(\*) STUDIA KURDICA kovara  
Enstîtuya Kurdî ya Parî-  
sê ye ku bi tirkî derdi-  
keve, her weha farisî û  
erobîya wê jî heye.





## çend peyvikên nû

Dr.Zimandirêj DEVJIHEVE

Homokutîzm: Homoseksualizm(..)

Homokut/Pîyawkut : Homoseksuel

Rexnegirtin : Tenkîd kirinekî normal

Rêxgirtin : Tenkîd kirinekî anormal

Rexnelixwegirtin : Rexneyekî pozîtif e

Rêxlîxwegirtin : Rexneyekî negatîf e

Rêxliyekîgirtin : Rexneyekî negatîf e.

(..):Li gor Dr. Bijîşk, nexweşîya AIDS'ê ji Homokutîzmê tê.

## du anons

Emrê min 76 e.Bejna min 180cm. ye.Giraniya min 80 kîlo ye.Ez ji gundek Bismilê me û ji Kurdistanê nû hatime.Li hevala leka porzer digirim,ku emrê wê ne di ser 15'an re be. Bejna wê kêmî 175cm.nîn be,û ji 50 Kg yê zêdetir nîn be.Divê bi ajnê zanibe û ji Beethovenê jî hez bike,yana nabe.

"Porzeram!"



Göteborg SWËD

Ez jinebî me. Emrê min 21 e.Diya 2 zaroka me. Ji tiyatroyê,ji dansê,ji muzîka klasîk û ji sohbeta li ser roman û fîliman hez dikim.

Muptelayê alkolê nînim lê li ber şîvê ji du îskan şeraba sorî fransîz re jî nabêma.

Tu,mêrê ser nerm ku wekî min dikare şîvê çêke,firaqa bişo,potikê zarokan biguhere û nav malê bide hev, li te digirim!

"Di Evînê De Wekhevî"

HEKKARÎ

# NAVÊN KURDÎ

Jibo zarokên we yên nûçêbûyî  
an jî yên li rê ne.

Agirkut	Hemekut	Nekut
Bakut	Hemokut	Nîvçekut
Bankut	Holkut	Pirkut
Bêkut	Homokut	Piyawkut
Bêrîkut	Jinkut	Pozkut
Bikut	Jankut	Paşkut
Binkut	Jêrkut	Pêşkut
Cîkut	Jorkut	Rêkut
Cunnîkut	Kerkut	Rotkut
Çakut	Keskut	Serkut
Dankut	Kêmkut	Sîrkut
Darkut	Liberkut	Singkut
Derkut	Libinkut	Tamkut
Elokut	Lihêfkut	Xanîkut
Erdkut	Liserkut	Zikkut
Hûrkut	MÎRKUT (x)	Zûkut
Herkut	Malkut	

(x): Dîqqeet!!!

Mîrkut, her heqê wê mehfûz e. Tu kes  
nikare bêmusadeya Mîrkutê navê Mîrkut  
li zarokên xwe ke.

Divê her kes vê yekê zanibe :

**HER BABET  
BELAVOK, NAME  
Û MESAJÊN HAZIR  
TÊN FIROTIN !**

**\*name**

- Nameyên evînê
- Nameyên serxweşiyê
- Nameyên eskera
- Nameyên pîrozbayîyê
- Nameyên ji bo Enstîtuyê

**\*mesaj**

- Mesajên Şevên Newrozê
- Mesajên Kongra
- Mesajên polîtburro
- Mesajên licna merkezi

-Mesajên bi slogan:  
5 Wereqe

-Mesajên bi sipas  
û silav:10 Wereqe

-Mesajên îsotîn :  
100 Wereqe

-Mesajên hingivîn :  
50 Wereqe

**\*belavok**

- Belavokên Newrozê
- Belavokên 1'ê Gulanê
- Belavokên li ser Rojhilatanavîn
- Belavokên li ser Kolonyalîzmê

Fiyeta belavokan li gor naverokê tê guhertin:

- Belavokên bi rexne: 12 Wereqe
- Belavokên bê rexne: 6 Wereqe
- Belavokên li Dunyê dûrim, Li Rojhilatanavîn dûrim,  
û li Kurdistanê dûrim: 20 Wereqe
- Belavokên damezrandin û hilweşandina komele û kovaran:  
50 Wereqe
- Belavokên damezrandin û hilweşandina rêxistin û partîyan:
- Belavoka "ÇIMA VEQETYAM" 25 Quriş 100 Wereqe

Nimûneyek ji qalibên belavokên me:

NEWROZ PÎROZ BE (1)

Her ku diçe Emperyalîzma Dunyê bi pêşevaniya Amerîka û dewletên din yê emperyalîst girtir, hartir, û çavsortir dibe.

Emperyalîzm sîstema kapîtalîzma monopolîsta herî bilind e. Xurt e, heta girikê çekdar e, lê ro bi ro qelstir dibe û nuha jî di doşeka mirinê de ye.

Li Rojhilatanavîn tu tiştê wekî berê nîne.

Her tiştê tê guhertin. Wîlo bilez tê guhertin ku ro jek wekî ya din, seetek wekî ya din, deqeyek wekî ya din nîne. Helbet sedemê wê jî emperyalîzma dunyê ye.

Wekî hun jî dizanin divê hemû sinifên karker û gelên bindest û pêşverû û welatparêz û pêşketinxwaz, û antî emperyalîst û antî faşîst û antî şovenîst hemû piştgiriya hev bikin û yek bin. Yan na emperyalîzm her çiqas li ber sekratê be jî, zû bi zû namire. Ji ber ku wek her tiştê wê sekrata wê jî dirêj e.

Li Latîn Amerîka jî rewş kêm-zêde wekî li Rojhela tanavîn e.

Li Afganîstanê jixwe hun dizanin çî dibe. Li Hîndûçînê her wisa. Li Afrîka Başûr dîsa wisa. Şerê Îran û Iraqê her wisa dîsa. (2)

Îcar li Kurdîstanê jî, ji Meda û vir de çavSORAN û weledên wanên îroyîn û rejîmên wan, tiştê nemayî bise rê me de anîne. Lê nikaribûne dengê me bibirin.

Kolonyalîzm li welatê me ketîye her derê, lewre di vê her kes vê yekê zanibe. Do çawa bû, îro jî wisaye û dijminê me sibê jî me li hember xwe dibîne.

Li Kurdîstanê îro pergala berhemîya nîv-feodal , nîv-kapîtalîst û nîv-eşîrî hakim e. Pêwendîyên berhemîyê jî her wilo ne. Avayîya ser û bin divê ji binve bête serûbin kirin. Û divê neyê ji bîr kirin ku têkoşîna birayên me yên Filistînî jî a me ye.

Xelasî nêz e. Emperyalîzm û xulamên wê yên kolonyalîst û hwd li ber mirinê ne.

Bibelqite Emperyalîzm!

Bibelqite Faşîzm û zordestiya li ser jin û zarokan!

Bijî NEWROZ ! (3)

(4).....

(1): Alternatîfên din:

*Bijî Newroz*

*Newroz hat*

*Newrozek din jî hat*

*Newroz dîsa hat*

*Me Newroz pîroz kir*

*Me Newroz bi hev re pîroz kir.*

(2): Navên welatan li gor darwazan tîn guhertin, kêm û zêdekirin

(3): Silogan li gor darwazê pîrr erzan tî dagirtin.

(4): Navê rêxistinê ji altyê xwedtyê belavokê ve tî dagirtin.

Erzûhal-Holdîng

Namenûs Belavokzade Xan, No: 99/z

Telf: 009933-44

DERVEYÎ WELAT

## XEBEREK TEZE

Z. Xamoyan,

R. Zilyan,

O. Kotyan,

M. Dirêjyan û

M. Baksîyan li gel Ş. Perwerîyan û çend kesîyan ji bo tezekirin û nûkirina zimanê kurdî çûn Îspanyayê...

Ji ber wê yekê rica me ji we hemû kurdan ew e , ta ku van hevalana biryarekê bigrin û vegerin divê tu kes bi kurdî nevişê û qise neke...Çimkî ewê qerarê bidin ku êdî emê çawa qise bikin...



*Komita îspanyayê di keftûleftê de.*

*Ji îspanyayê muxbirê me Hecî Mirkutyân*

S.O.S.  
IMDAAT!

HAWAREEE!

ME TEHDÎT DIKIN!

ji alîkî de PAKSÎ

ji alîkî de jî ZIKTA LEYLANÎ

me tehdît dîkin!!

Lê, emê ji yeka xwe neyên xwarê!

MÎRKUT



ZOZO

QEDYAN,

DOR HAT

LOLOYA !!

Matlaka

## Sofî Lawo



Wextê şerdê Şêx Seîdî di, yew merdim nameyê ci Sofî Lawo bî. Yew tifingî cêw çaqmaqlî bî.

Aw zeman teyare amey bî, Gêlî(Eğil) sera vi-retênî. Sofî Lawo tifingê xwi gêno, teyare ra nano. Tifingê cê dest di parçe parçe beno. Sofî Lawo wano qey lengera berdê teyara vista û wano: -Vazdênê, mi lengera berdê teyara niya, teyara zî Keramordik(.) di kewta !

Ewra di yew wano:

-Sofî Lawo, aya lengera berdê teyara niya, aw tifingê to yo, to dest di parçe biyo!

---

(.):Keramordik:Nizdîyê Gêlî di yew ca yo.

Xalê NÛRÎ

## İKÎ ZANÎE?




Wekî herkes dizane ku li Swêdê kurdê herî menşûr PAKSÎ ye.

Gelo li Almanya û Fransayê kî ne ?



# ÇARÎNEK

Ez ne di koxa bavê kesî de mirîşk  
Ne jî di bin mirîşka kesî de hêk im,  
Tu kes nikare min bimirîşkîne  
Ji sedsalan û vir de ye her dîk im !



*Navê Şair dî  
arsîva me de veşartîye  
ger pêwîst be em di-  
karîr rojekê jî we re  
navê wî jî binivîsin.*

## PÊKENÎNEK

LE

JINEKEY

NATIRSÊ



Yekêk be hawrêkanî delê:

-Ewî le jinekey detirsê hestête ser piyan!

Hemû heldestne ser pêyan tenya yekêk nebê.

Le wî yeke depirsîn:

-Wa diyar e, to hîç le jineket natirsê, bo ye  
helnastîte ser pêyan?

Kabra delê:

-Be xwa qaçim birîndar e, çunke emro jinekem  
darêkî baş be qaçima malîwe!!!

# XAÇA SOR A KURD ÇŪ HEBEŞİSTANÊ



serokê heyetê  
Dr. Zikta Leylanî

Xêrxwaz û hevalbendê feqîr û nexweş û belengaz û perîşan û bêçar û tolaz û pêxwasan Xaç a Sor a Kurd li gel Xaç a Sor a Almanî ji bo alîkariya felaketzadêyan bi sê qamyonan çûn Hebeşîstanê (Etiyopya).

Serokê heyeta tevlîhev Dr. Zikta LEYLANÎ berî ku bi rê kevin, li Bonn'ê li meydana piştî îstesyonê derket ser qamyonekê û beyanek da. Dr. Zikta Leylanî di beyana xwe de êş û liberketina xwe û di rojên wisa de giringiya piştgirîyê dîyar kir.

Barê qamyonan KARTOL (petata), BULXUR, PÎVAZ û LEHANE (Kelem) bûn.

ANK'a Mîrkut/Bonn

---

NOT: Te dî دنیا ye, çî dibe çî nabe, belkî rojekê adresa Xaç a Sor a Kurd jî we re lazim bibe, adresa wê weha ye:

"Li Bonn'ê li piştî îstesyonê kuçeya yekem na, ya duwem, li milê rastê bizivirin heta ku 'Egîtek leqayî we bê, jê bipirsîn. BONN/Almanya

# KÎ ÇI ZANE BAV ÇAWA YE ?

Yekî derewîn digot: " Kes tune ye ku di ser min re derewan bike! "

Lê, wextekê bihîst ku derewîneki jê xerab-tir heye. Dibêje "Wele ezê herim vî merivî bi bînim, hela kanê çawa ye, çawa dikare ji min zêdetir derewan bike.", û bi rê dikeve diçe. Tê ber mala derewîn, li deriyê wan dixê. Lawi-kek dertê ber derî, mêrik dibêje:

-Ma ev der mala filankes e?

-Belê apo, ez kurê wî me, te çî divê?

-Wele qet, hema min got ez bibînim.

-Fermo derbasî hundur be apo.



-Ma qey bavê te ne li malê ye?

-Na apo.

-Êê, kuda çûye?

-Wele li wê taxê tîşek bi 'ewrekî ketiye, çûye bi hev ve bidurû, ewê nuka were.!

Mêrik 'ecêbmayî dimîne û ji xwe re dibêje :  
"Wey xwelî li serê min û bavê min be, hela tu li kurê wî binêre, kî çî zane bavê wî çawa ye?"




## P Ê K E N Î N E K



Rojekê gundîyek ji Cilîna, ji xwe re bawêşîngekê dikire. Lê ji bo ku bawêşînga wî kevn nebe, bawêşîngê li ba nake, lê serê xwe li ba dike..!

# BANGEK



DIVÊ HAYA HERKESÎ JÊ HEBE, JI VÊ ŞÛN DE  
EW KESÊN KU BÊ ÇEK Û SÎLEH BÎN DÊ NIKARIBIN  
DI ŞEV Û ŞAHÎYÊN KURDAN DE CÎH BIGRIN.


KESÊN KU DIXWAZIN DI ŞEV Û ŞAHÎYAN DE  
BEŞDARBÎN Û CÎH BIGRIN, DIVÊ BI KÊMANÎ DEBAN-  
ÇEYEK WAN HEBE.

NOT: Di şevan de kesên xwedî keleşînkof dê li  
pêşîyê rûnin.

Gulle û fîşekên sîlehan jî di şevan de li  
bufe û standan tên firotin.

## BANGEWAZÊK !

Bo xawênî romanî "TO"




Kakî bira,  
Şiteket be destman gehîşt. Be rastî ser û binman  
kird, le mebest û merameket halî nebûyin. Xo nazanin  
nawerokekey "ROMAN" it basî çî deka!

Bê qeza bî, hey bê bela bî!  
Nawerokekey bo man nedozrawe kebasî çî dekat, ta  
ku zû wa bangewazîyek bike boewey belkû xelkîtir bi  
tiwanê yarmetît bidat û nawerokeket bo bidozinewe.  
Ew kate êmeş be çawan em romane dirêjet le lape-  
rey "Mêjûy Edebî Kurdîman" da bot çap dekeyn û bee-  
meş hengawêk edebî kurdîman degeyênite ser qebr !

Lepirsrawî beşî Soraniy  
Govarî Mîrkut

helbestek ji

**Mahmut BAKSI**



“Eştil beştil Evdilla  
Evdilla çû mala mela  
Evdillê keça melê xwest  
Melê anî serê Evdillê bela.» (.)

-----  
(.): M. Baksi

Şivan'ın Sevdası, 1984

rûpel: 98



# her babet xwendevan

Ji vê şûn de, emê her carê di vê rûpelê de wêne(rism)yê her babet, her cûre, her te wir, her çêşit xwendevanan çap bikin. Nuka em sê babet ji xwendevanan li vê derê pêş kêşî we dîkin. Ger xwendevanên ku dixwazin rismê wan jî derkeve, divê wêneyekî xweyî reş û sipî bişîne, an jî bila bi nivîsekê tarîfa xwe bike û bila dirf û nîşanên xwe bellî bike wê gavê emê rismê wî çêbikin.

Mîrkut

Ji we re sê babet xwendevan:



Xwendevanekî  
Belengaz



Xwendevanekî  
Kezibreş û bêûjdan



Xwendevanekî Rût